

四庫全書

集部

欽定四庫全書

集部

方舟集卷五

六

詳校官庶吉士臣龍廷槐

主事臣呂雲棟覆勘

謄錄貢生臣苗序濂

謄錄監生臣汪葆

欽定四庫全書

方舟集卷五

宋 李石 撰

五言絕句

題師永錫知縣畫老竹枯木二首

霜雪倚巖樹霧雲秋水槎且須高著眼上有曇鉢花
水墨三十年一枝更一節工夫不爭多儘立庭下雪

題李都畫枯木

毫端看運斤筆老木亦老莫畫春風枝秋來厭枯槁

次韻趙榮州題蘆鴈畫

畢弋橫前路江湖寄此身
平沙下雙鴈不見問津人

水仙花二首

碧雲玉搔頭對景山月皎
霜靜在更深風香我先曉
肌膚剪秋水垂雲出龍宮
我意得子珮笑許無言中

叱馭橋

鸞鳳飛綠壁虹蜺下飲溪
一家蠻瘴裏九折夕陽西

謁武侯廟

此地蛟龍伏中原
蛇豕多借君白羽
扇萬馬飲黃河

蠟梅二首

黃昏澹烟晴風健
香骨透煉金呈赤心
山月惜孤瘦
莫學卧鬢花嬌黃
媚粉額仙官道家粧
靜處立標格

鷄鳴關

關路入雲平泥塗自送迎
書生無馬癖客子效鷄鳴

次韻張當進題神君廟

桂檝方東泛荷衣已出塵
曲江尋相業猶是姓張人

子夜春歌二絕

新挑錦字書倒指歲月遠愁眉要深黛燈花已堪剪
瘦玉薄薄衫暈燈和月冷獨夜不禁春梨花碎簾影

題蘇氏巽風閣

蘇楠作閣乞名李石以巽
風名勉以不忘東來之意

巽風起東南大地萬物小吳門共延矚匹練橫江表

扇子詩

雨挹春紅淺風酣晚藥稠看花不著意何事亦關愁
斯文悔少作自謂老更工不是舍人樣合住此山中

芳草遞春風三山立桂叢柳條隨駕綠花藥上林紅
釧動香飄麝簪低鬢拂鴟休遮笑裏面用比庭前花
火老不知秋螢飛風露下和月立梧桐幽人宜獨夜
竹影月來去荷香風送迎南窗枕書卧醉眼看山橫
水浸菩提坐風傳戒定香藕根金鎖骨花面玉毫光
月下九九仙雲間七七泉喚起吹簫子跨鶴飛上天
積雨莓苔色秋風松桂林莫隨蓬鬢改黃落見真心
海濶千江轉風翻大浪隨六鼇元未足不是下鉤遲

薰蒸香積厨精鑿午齋飴飴後且放參林下香一瓣
黑風吹海立雲水渺三韓叢笠漁舟裏無心下釣竿
江海翱翔地舟行岸自移無心波浪裏鷗鳥不須疑
引手折纖枝月邊簪玉兒好與一杯酒酒香知是誰
衆水秋風勁羣鷗白雪和只宜閒坐釣湖海老烟蓑
風雨樓上笛燒春寬作程眉峯須小蹙梅子彈丸青
露冷藥珠珮五湖雲水深一枝春好在先寄月邊心

秋月二首

夜榻近虛簷獨卧玉蟾冷梧桐氣先奪端不礙清影
江草半黃落江雨催授衣衣中有斷線客子秋念歸

感事

一水遮金騎諸州辦甲衣書生投筆硯隨口說兵機
老大年光迫纖花又一春鵲占風外歲雞唱雨中晨
一徑清如掃柴門霽影多苔莓因鵲啄非是客經過
三起復三眠吹花漲雨烟浮萍增來色輕壓綠池蓮
苔掃彌旬雨花開數日晴蝶輕矜鬼翅鷺巧學僮聲

綴綴復翹翹金絲並玉條醪醕與楊柳結託上青霄
踏碓村春急繰車並舍忙雀桃紅綴吻鶯栗碧成囊
茶寇征商急偷生蔽綠林江湖自有備盜賊豈初心
近日江西將常兵已駭聞不知蜂蠆陳敢抗虎貔軍
請借三分勢仍分七路兵是免雖乳臭莫近呂蒙營

六言絕句

扇子詩

節節荷風驛置疎疎竹雨龍慳歌枕幾聲鼓吹捲簾數

筆湖山

月樹吾人傾蓋風蟬老子聞韶喚起江湖春夢幾番鼓
角秋潮

眼界琉璃鳥度腹中沆瀣蟬清猗蘭羲獻父子瘦竹夷
齊弟兄

冷著松聲似雨凍教井水成冰猛火燒天燒地清涼谷
裏閒僧

晴日淺深著柳暖風高下吹花醉裏蝴蝶作夢醒後狂

蜂報衙

今古一場夢
嚙乾坤六博呼盧醉
裏猩禽著
殺醒後驪
龍憶珠

修竿其釣莫釣
短艇似漁非漁
欸乃一聲山水杏
林夫子琴書

蜂蜜新房日課
燕泥舊壘年勞
睡起香爐圓覺
醉中山
芋離騷

蘄竹皮膚事業
齊紈手腕工夫
跳出二乘火宅
直饒一

段冰壺

猛火橫秋如爍銀河冷浸月脚三更獨立梧桐不恨夜涼衫薄

東海夜潮春枕西湖曉雪窺窗香佩幽蘭開國褐衣明月迷邦

鷄蟲日得日失鵬鷃風高風低天道先者陰陽人心何忍自欺

月波半浸楊柳穀雨初勻牡丹夜酒只堪歡酌春羅不

耐輕寒

師資為學之規朋友為學之勸說與潤屋千金何似傳

家萬卷

錦煖海棠欲睡絮濃楊柳初眠蝶老鬪高屢舞鴛鴦學

語如絃

冷熱衰盾之日清和夷惠之風天運自有常度世態人

情不同

顏子見善則遷子路有過則改懶則鮎魚上竿勤則大

鵬跨海

茶交君子之淡酒飲聖人之清醉為天下大老睡則吾

輩神兵

負笈無他奇貨筆端有力躬耕楚道頗思山谷蘭陵一

變荀卿

舍妹叙
州守學

葉葉深雲湛碧花花晴日搖紅當是身薰成種不干秋

水香風

栢樹庭前度夏荷花池上經秋若問西來拄杖何如南

金瓶梅
卷五
去輕舟

僧扇

風輕匝破世界山僧如如自在箇中純白團圓洞然法
香水海

隱几今昔兩箇卧床左右一邊正要脚根著地莫教火
焰燒天

涪上拾遺今日泉聲一炷青雲會道傷春傷別世間惟

有司勲

杜謙
夫扇

春煖錦棠覆徑夏涼紅藕盈池九葉東籬綻菊一花南

岸梅枝

功德海中遊戲菩提樹下清涼只有登山一醉嘯聲分

付孫郎

孫令
扇

竹影千林一族此中孝子門家釋老曾經抱送詩書便

是生涯

陳恩
孫扇

三召三逐去之老眼已不識路偶然得箇漁家此是桃

溪西渡

先睡也須先覺多文也須多學如此沒量大人不知可

畏可貌

達摩一字無法惠子五車著書透關九重見虎離鉤三寸求魚

七言絕句

黎廳相並栽栢生意可喜

一級寒堦不盡登齊腰立雪我何能庭前栢樹君知否便是西來兩代僧

眉州郡圃種栢三千

三千握翠遶池亭他日摩挲考歲星為語邦人須耐久
春紅何必似冬青

彭州送花

市上芳菲小洛陽誰家細馬走紅粧名花未恨東風老
只恨先生兩鬢霜

諸友惜別夜坐德行堂飲茶

一舟海角到天涯春信江南梅欲花莫道別時無酒語
與君剪燭夜烹茶

東湖探梅

短短青蒲淺淺沙春風不隔水仙家一枝未報江南信
旋琢湖水看雪花

軟條蠟梅

南衙柔軟北紫紆霜碧霜青各立株但得東皇均一笑
黃梅吹蠟白吹酥

蠟梅

霜林作纈菊成衣只道花多綠葉稀辛苦為他成蜜後

蠟蜂猶是趁花飛

一株坐斷寶花臺
冰雪光中眼倦開
無事暗香浮鼻觀
思量也自識花來

題馬仲友畫花下猫二首

花相春歸盡錦仙
輕雲羃羃護花天
莫燒高燭三更月
自有真香一炷烟

黃鸝鷓鴣鳴處處
聞花開時候度重門
啄花莫啄枝頭錦
留與東皇覆酒樽

別金顏老

涪州一別十年彊君自游行幾退藏好是金顏無佛處
却來鐵面坐禪牀

笑傲叢林落托仙閒心不縛十方禪野狐豈是藏身處
水牯真成豁鼻穿

謝夏彥博知縣惠落鴈木并紫筍茶綠菜二首

紫筍先期火未鑽綠芹猶及薦春盤江湖別後渾忘味
恐把南烹累長官

入用定知材見伐不鳴仍以鴈遭烹漆園二物都疑著
老去從軍得細評

趙權可許惠筇竹山峰佳者用前韻戲之

使君未怕牧蠻官遊戲邊藩不作難龍竹風霆驚物化
鼇山鼉屨照人寒

史宰北湫禱雨

龍卧西山護密陰肯來北洞禮觀音便分楊柳軍持水
與作商巖早歲霖

贈釣車道人

鐵彈牽絲響釣輪
魚竿妙與易通神
莫將瓦卜欺天眼
誤看凡夫作道人

釣車道人遠來再以前韻贈之

泥行草屨自扶輪
來上平岡問谷神
要識方舟老博士
盧敖元是避秦人

紅梅閣二首

天上佳人雲縷衣
暗傳春恨入新詩
樓頭玉笛闌情緒

不念殘香結子時

試來紅閣覓飛仙
花落花開不記年
未問庭前幾枯樹
已將身世等桑田

梅花

零落孤根玉雪團
天孫剪月試天寒
凡間諱白驕紅紫
却把梅花作杏看

題薛公肅問梅圖

湖風吹衣第九節
瘦如梅花骨欲折
詩魂別後誰與招

獨立西湖樹邊月

採桑

籠鉤在手茜裙襦蠶老風暄日欲晡我是采桑菩薩女
不煩下擔捋髭鬚

寒食

街頭春柳弄疎柔閉戶何曾一醉謀只道將家對寒食
三千風雨隔松楸

荷花

優曇寶樹作香林
佛面輝光紫磨金
峯頂蓮花高十丈
便敷妙座出花心

感事

輕衫輕騎雪邊州
不是書生戰不侯
卧枕太阿龍夜吼
夢隨冰凍截河流

指謂名場結淨緣
修行隨處護龍天
只今挽下銀河水
已污緇塵四十年

大雨水憂三堰決
壞且念吾挺之在病
無與共

此憂者因走筆為問四首

秋夏之交天雨水來不少熱更多火光焰焰毒人肺
不惜一濕傾天河

淫雨不止已及月廢屨供爨無宿烟池蛙齊聲振鼓吹
苔蘚一色堆金錢

人道西山有龍穴雷霆動江二水深龍仙且莫壞我堰
我堰一決人陸沉

君今已作十日病我去頗覺三秋遲俸錢不來水破甕

君自不飽我忍飢

墨池

寂寞遺風草玄客
載酒重來尋舊宅
千年公議闕無人
往往更嘲池水白

北田梅

亂挿繁花霽影中
忍教雪片掃狂風
從今準擬青梅子
雨點梅尖醉頰紅

永兄作靈照寺墨梅兩紙殊佳仍書二絕其上

以為餉次韻謝之

荒畦草棘暗霜秋
菜飽無期那不愁
去去携籃問靈照
此間熟處要經由

不干老眼眩生花
自是詩人醉墨斜
從此絳州烟水窟
竹籬茅舍子真家

竹間讀書

携書携酒秋竹根
拂石讀書橫酒罇
只有梅花如我醉
一枝和雪亞前村

鄧通城

相公舊築與雲平千載氈裘尚震驚多少金錢滿天下

不知更有鄧通城

史記賜鄧通嚴道銅山得專自鑄錢城在黎雅之間銅山在黎

題羅漢院畫像

一任猜嫌極口憎布衫裹鐵面生棱何如乞與袈裟著
畫作西山十七僧

贈龐玠術者

難易如何是祖風却將性命問龐公向來一口西江水

因甚談天不落空

悟仙庵

擔頭活計任推移
前世生身後世知
瀝血山中留語句
至今楸上繫驢兒

羅真人祠詩二首

老木深龕閱歲年
我來何處覓飛仙
葉邊蟬翳此其地
根底龍蟠合上天

龍舟萬騎入川來
天上鮫綃水府開
便與真妃充土物

凌波香濺不須裁

羅江舊為萬安明皇惡賊姓改焉意其以羅真人之故如羅村羅山羅公

亭皆縣誌所載其曰以二水相慶成紋鄙俗甚矣

再以韵謝吳美仲和篇茶罇之貺

東屯花惱只顛狂
五柳門前翠著行
更遣大瓢來斷送
恐教醒醉問漁郎

題草堂

百花潭上轉踈松
金碧彫殘古寺空
只有草堂人不見
淡烟暗日馬嘶風

白鹿得萱花

白鹿山頭一望平歸來衣袂作風馨庭萱巖桂方爭秀
總入觀音淨水瓶

漱玉軒為邑之佳處頃春祝寺僧少葺之重來
則眼界增明矣因拉王和叟劉曼卿相與碎建
茗淪之泉上石作觀音像通悟禪師手琢亦甚
靈異賦三絕

毒露炎炎海瘴浮一軒誰與聒清秋雨花天上清涼手

挽取銀河作玉流

泉上觀音駕海潮白芙蓉裏碧雲飄便當踏月隨天步
環珮無風自動搖

知是禪師琢玉工玉聲猶作水玲瓏琢成大士笑無語
只在聲聞一悟中

堅老師相訪誦法華經如流

八十童顏抹霜雪琉璃碧眼蓮華舌不將象步楚驢騾
坐與如來過小劫

道衛甥送酒

親旁未敢酌貪泉白髮風燈喜懼年渠輩相誇玉藥珮
我貧正欠杖頭錢

謝浩然以夢告且賦詩見贈次韻復之二首

步遶西湖九里松歸來詩句有新工舊游開眼誰同夢
又欲携君過浙東

縛草徒然未若賢絕韋老矣定誰傳舞雩著我三千子
華表須居五百年

謝浩然嘗為余作異夢余再被召浩然有詩次韻復之二首

舟楫風濤檣與松一堂白髮幾篙工江湖萬里吳天迥正在巴陵日本東

巖棲誰似昔人賢好夢通靈莫浪傳號召我今成再往飛鳴君已及三年

石過青渠壁間有何人者詩欲梓潼神君戒殺以從佛神君初以孝廉舉豈自污於一飲一食

之間為哉后稷肇祀庶無罪悔以迄于今試以
此語為解嘲并賦小詩呈時發縣大夫一笑
香茗簾疏肯破慳相公日食萬羊山夫君何厚神何薄
自取懸鵝一水間

武侯祠

風弄波濤鼓角喧蜀江猶有陣圖存綸巾羽扇人何在
眼看羣兒戲棘門

示郡南二孫

虞初祕府六百本老子柱下五千言吾家道學天生種
端有斯文示子孫

立春

羣兒綵勝競芳菲我向新年補舊衣五十九年蘧伯玉
不知誰是更誰非

青菜青絲白玉盤西湖回首憶臨安竹籬茅舍逢春日
樂得梅花帶雪看

瞿唐峽

我行江南上峽來繫舟夜泊雲雨臺行到西川一萬里
杜鵑聲急桃花開

試嚴志行筆

龍跳虎卧王右軍蠶頭隼尾始逼真不恨臣無二人法
但恨二人不似臣

題昇仙橋

茂陵讀賦喜虛無不是題橋使丈夫漫說歸鄉誇駟馬
也曾滌器對當壚

題海棠二首

百鳥啼春樹樹紅輕舟掠岸往來風江南江北花多少
都在先生酒盞中

林光皎皎弄青枝頗怪東風解凍遲一夜前溪流雪汁
餘花別岸不須吹

謝王公才惠資陽梨二首

老火丹田熱欲吹不妨永雪重提携金多不用千頭橘
刀割無嫌三藏梨

滿盤冰玉豈虛投落筆瓊琚未易酬欲寫霜柑三百顆
更尋火棗八千秋

公壽送蒲萄以酒荅之二首

老眼黃昏眩著花鼻頭白晝夢南華一杯世味蒲萄熟
薄薄分明勝煮茶

一宿逡巡為酒忙暗泉傾乳聽槽牀南隣無物酬佳伴
依舊巖花釀蜜香

小孤廟

喚作孤姑恐未訛寄名櫟社不爭多但云龍女來行水

免使牛郎暗渡河

楚地牽牛分野
解彭郎之嘲云

彭州上元二首

蜀川東抱戰聲流元夕來監舍畔州莫把華燈照人淚
只堪掩面替民愁

河漢無塵碧玉傾萬枝燈裏仰天庭吾皇慈儉如堯舜
應有天邊退舍星

夜讀韓子蒼文二首

四海文章六一仙
江西名派蜀人傳
從今元祐無多子
虎豹狐狸各斐然

二河忠義雪山重
元祐何由見古風
一月羣星雖晚出
斯人尚可殿諸公

聽水琴

本自無絃奏凱風
水流空洞作丁東
蘼蘼老向伊耆氏
何必聞韶肉味中

周公帽

周公山山頂雲合則必雨土人云周公帽

山頭戴帽周公雨巖下生衣傳說霖莫道蠻州無此樣
可憐老我十分心

次韻孫翊尉

口頭截斷不須工誰信春秋是國風筆下均調成一氣
東屯喚起杜陵翁

芻狗分明迹已陳鑿開七竅是天真低枝斥鷃從渠笑
深水蛟龍得自神

子佩青青得玉工先生老矣舞雩風仙官便擬輕藜藿
我欲求為田舍翁

頌古塔祖勝二首

蘆花岸下蓼灘頭上得鉤時便上鉤一曲漁歌川棹撥
五湖烟水月輪秋

天津橋上弄胡猱女子從來不出門却被罔明穿鼻孔
鬢邊香撼玉梅魂

楊尉三和篇補其二以為答不敢虛盛意

前時赤旱要刑鵠今日平田漲綠波不特蛟龍偏得意
可知蚯蚓亦能歌

湖亭飲酒對新鵝金錯杯中卷白波村鼓鼕鼕更堪憶
畫船照水採菱歌

栽橘

封君培壅百年心准擬霜秋色更深辦取數錢收一掬
此奴隨處即成林

香橘二首

霜餘裊裊擷秋芳
露洗娟娟百寶光
齒冷欲餐瓊樹玉
手溫誰握洞庭香

千林獨覺一林芳
穠碧攬先送曉光
魯酒未妨杯雪冷
麝蘭半雜袖風香

扇子詩

無適無莫羲皇人不憂
不懼擊壤民只有太平容易事
更於何處費精神

鼻端栩栩師南華
脚步落落邱東家
一春多病守牕戶

仰看蛛網粘楊花

吐火生熟風生涼自家富貴他人忙不為求蛇熏老鼠
翻成打鴨驚鴛鴦

楊柳飛時春睡濃老夫無力看春紅一杯徑盡卧禪榻
高下任意吹花風

梅裏尋酸却得香舌根未舉鼻先嘗筭來大似輸他眼
老去猶堪玩雪霜

春江拍拍浴鸞兒一夜潮生水漸肥畫舫正將桃葉渡

彩橋隨處柳花飛

柳間坐鍛搯叔夜過眼餘子何人哉卿亦安用識我輩
所見所聞無去來

也不悲噫也不歌只將恬淡養天和團蒲徙倚誰呼覺
夢裏分明被佛呵

黃葉鳴林捲地風一天秋色鴈橫空風狂吹作歌斜字
似我遙書咄咄中

機鋒相拄不爭多父舞三臺子唱歌若問一時同啐啄

菩提般若六波羅

一峯赤松橋上老三杯玉案甕中仙駢驢出去知何日
跨鶴歸來得幾年

拈花示病元來怕遇酒逃禪却未真三古絕編徒自聖
二王書法恐非臣

世態一日添一病好書百過消百憂羲皇已上自可樂
季孟之間何足求

清涼谷裏必萬僧猛火叢中續佛燈車馬鹿羊隨大小

不知何處是三乘

蝶兒也解宿香叢蜂子尤能醉蜜紅幻景掃除餘結習

自携茗椀漱花風

無心已作不鳴鴈恃氣多慚反走鷄大道三杯仙落托
隨齋一鉢佛菩提

鼻中出入一毫端不論春溫與夏寒十二時間無別法

只將心事轉天盤

王刻
漏扇

香積盂中玉粒圓自然肥佛勝癯仙萬金有藥元非病

一笑拈花却是禪

桃花流水神仙地枯木寒巖自在春
錯上磨成白玉質
礦中仍現紫金身

君子軍中萬戶侯文章經史總兼收
却將我輩毛錐子
奪取將軍丈二矛

春來誰不看花忙
裊上仙風散佛香
人面何如花面好
贈君一點下禪床

夜涼紅藕六銖衣
露滴銀床樹影稀
醉把玉簫風鬢亂

乘鸞初自月歸來

白團扇子合歡裁出水菱花鏡面開好是緱山明月夜
大家騎鳳上天來

神農醫王七十毒金粟如來四百病未如一卷混沌書

淡飯麤羹學清淨

醫扇

芒鞋踏破江頭路日渴檀心猶未吐渾教開盡不成梅
定應化作相思樹

小小愚民豈易欺士夫妄論似相知業書若上天盤秤

當用崑崙作秤鎚

衆妙香中出佛身小兒造化不能嗔要知白塔降魔手

黑鬼元來怕黑神

白塔老賣
黑神九扇

戰葉初收雨點稀入簾花影碎晴暉莫留一物遮人眼
展出青天放鶴飛

山陰五月雪芬芳猛火叢中雪放光比似瑞花成六出

夜深更與佛燒香

蒼菊
花扇

子美來投蜀錦坊蜀人滿口說文章卿雲已後成機杼

不是無才賦海棠

八尺藤床六月天
林間風露飽鳴蟬
手揮如意葛巾墮
誰誦黃庭驚晝眠

海鳥已飛空自苦
池魚雖美可長欺
白君鬚髮知多少
是我山齋睡熟時

白團扇子白紗衣
怕見螢光作火吹
屈指西風明日是
會將束縕乞憐時

一葉梧桐一片雲
秋風江上日紛紛
鷗來鷗去吾何預

不向聲塵著意聞

峽圍碧玉裹青天
棧道凌虛迸出泉
只有好山須強勉
為渠開眼冒風烟

止息未論山水音
有絃無絃只此琴
一杯山芋午茶罷
膝上南風慈母心

琴

蚤來晚去海波生
蠻觸封疆不足爭
袖手更須饒一著
也知豎子要橫行

棋

硬黃細字不足撫
積習水墨閒工夫
膝上無心學李衛

腕頭有訣付善奴

書

十日五日愁良工白團扇子月面同一螺黛墨洞房手

為君小筆開眉峯

畫

野色橋邊綠草新小園勝絕可尋春花間蠟屐蜂隨步

竹外題詩月傍人

露葉涓涓泣素秋旗亭罇酒解忘憂別來頻寄加餐字

莫遣新詩學四愁

畜樊利口鷲成母張艾虛心雉作媒耐冷強書秋後扇

餘醒更罰醉中杯

六月三伏猛火燃卧龍無雨口生烟
蜩蟬何事得美蔭
聒聒不上高樹顛

秋扇秋風不怕寒喜攀明月傲霜團
自知奪精無他過

造命何如活命丹

術者
翫

寒藤霜露又經秋夢入江湖戲白鷗
二十年來行脚地
耆婆天上看河流

手栽楊柳喚春歸喚得黃鸝語碧枝驚起南牕一覺睡

滿庭花影日高時

靈樞先生出三指看盡世間人作鬼我有一把黃昏根

出君五臟為君洗

醫人扇

春事曾看滿眼花樓高不見玉人家峽雲夢斷無消息
想像紅裙踏鴈沙

行脚歸來馬簸箕重龍山上有駒兒鋤鋤底下無人問

要見江湖船子師

僧扇

薰絃早已迓秋鴻歲事先生逆料中前密後疎隨處改

枉教楊柳怨西風

三丈為樹八尺行花艷桃李葉柘桑元龍自是湖海客
師德去尋田舍郎

一介吾儒孰重輕青天蜀道少人行芋魁豆飯吾儒事
不若歸來谷口耕

嶄然頭角翁家兒兒會讀書兒不癡桂樹團欒五百丈
月邊引手攀高枝

三秋桂子玉舒花天上樓臺出帝家只許阿儼操杵臼

不知更有玉蝦蟆

范唐卿扇

釘餌蛛絲織網羅坐看牛女夜斜河只今頗怪人間巧

見說天孫巧更多

一葉浮蓮不動塵湖風吹水碧生鱗舟中喚鶴歸來晚
手展黃庭卧白蘋

缺月穿雲弄晚晴讀書燈影度微明梧桐未肯收殘雨
猶作窻間打葉聲

對使破琴良未達解衣撾鼓亦非真從來我輩豈同俗

更遣阿戎來問津

數竿修竹蔭庭宇上有真禽百般語
避人飛去却忽忽
驚落枝頭夜來雨

秋藥深紅勝菊黃拒霜却是最宜霜
仲謀有子來江表

先與喬娘醉晚粧

孫生笑
蓉扇

洞中龍老不知年
榮隱先生穩著鞭
大袖長歌出天漢
信乎平地有神仙

白白紅紅不直錢
吹風吹雨逼殘年
種桃自是非君子

指李渠能著老仙

拙眼捫星絕漢津只知仙跡混風塵
天衣自是非針線此巧如何說向人

烟雨青絲百尺樓江南樹樹拂人頭
此間豈是藏罇處醉裏一聲黃鸝鷁

危冠廣袖楚宮粧獨步閒庭伴夜郎
自把玉簪敲砌竹清歌一曲月如霜

彈指花前一念差東風未老鬢先華
看花只得心隨眼

心倦何由眼見花

春去春來歲歲同
花開花落任東風
只堪美酒酬佳景
莫把閒愁料化工

亂紅亂紫滿林塘
旋掃苔莓一徑香
寒食年年新火令
落花何必恨風狂

四月四日夏令新
餘花更饒三日春
榴紅裙子凌波鞦
一曲南風花笑人

親見廬山面目來
翻經臺上月輪開
山間長物渾無用

多斫雲根入蜀栽

素練咫尺十分圓
淡墨濃陰畫手傳
惟恐動搖天地窄
只應掌上握山川

舸艚市中漁者漁
茅屋岸上居人居
陽坡細草馬隨鹿
烟水靜花鷗趁魚

娟娟腰肢翠拂眉
河東柳家嬌女兒
江南烟雨樓百尺
樓上何人題好詩

黃金坐擁佛衣紅
風動荷花香動風
鼻觀浮香誰領會

嫦娥夜泊水晶宮

芙蓉香泛白蘋州
楊柳吹花玉雪浮
且喜兩邊無一事
五更鼓角月當樓

花自為王橘自奴
便應次第問東湖
芳菲未礙滄浪色
照水吟詩鑷白鬚

上頭圓蓋下方盤
中央癡憨白肉圓
九竅八骸渾不識
更來底處覓心安

誰將弱水隔蓬萊
對酒思君眼倦開
醉夢只堪逢故舊

五更酒醒却歸來

愛他國色艷傾城
老衲心城百萬兵
便使有情何足動
幻花況是本無情

未容穀雨淚胭脂
且趁晴風小小吹
鏡裏日高酣睡起
也須瘦了一分肌

先生種柳懶低頭
骯髒門前也可羞
莫向東風弄霜雪
且隨風勢袞成毬

本來騎鶴上揚州
不學老君誇白頭
丈夫要活三百歲

獨在中書二十秋

只教人喜莫教嗔此是天公最至仁
吹落吹開俱有意閒花野草漫爭春

變將冬暖作春寒葉上霜痕苦未乾
菜甲麥苗須少待扶輪何日上長安

洞庭波浪五湖秋縹緲雲霄帝子樓
樓上故人窮骨相簫韶聲裡認仙舟

岳陽樓翁

碧海鯨魚掣釣綸後生立意要求新
求新未必勝如舊

蘇李元來是古人

蠟面吹香細細斟青梅不厭綠杯深
鴛鴦燕子能饒古
要問先生學醉吟

栩栩齁齁睡足仙
華山濃睡一千年
龜兒不食龍兒蟄
睡裏人間變海田

一飛居憂題扇贈之

南山雪色老於菟
鏡裏功名鑷鬢鬚
袖裏白巾渠信否
樽前一擲看呼盧

王真畫桃花玉頰兒扇

飛上桃花玉頰兒
小紅輕踏碧萋萋
莫教啄破枝頭雨
怕見顰脂淚點垂

獢蠻給衣

蠻官云久不來漢間太博是箇大人故來

氍毹重譯裏風腥
改襲衣冠拜舞輕
不是兩階蒙聖化
應將五餌笑書生

德輝郎君名嘉橘其小字也書來云修嘉辰故

事並蒙惠二尊悵然有感二首

風高準擬整烏巾
簪菊難逢酒主人
為語閉門投轄子
一般麴蘖萬家春

逐客佳晨省醉眠
出門未辦杖頭錢
却因厨釀分雙榼
添入詩圖作九仙

次韻季真留別

即物那知身是客
黃花空自委離東
淚痕已逐西風盡
只有悲秋寫未窮

秋夜待月

白毫光裏玉魂飛
留看常娥醉魄迷
一任簷牙沸蝙蝠
恐將明鏡照狐狸

九日四首

從來醒醉不關渠
肯為籬邊問所須
冷笑淵明癡望眼
只堪把菊佩茱萸

癡兒索錢要沽酒
吾豈給兒囊已羞
乃翁作詩須汝和
覓句共登西北樓

昔人卧聽門前雪我亦坐看籬下花不是雨多門自掩
情知歲惡酒難賒

典裘買布得杯觴俗認虛名作醉鄉溪雨山風妬酒色
踈籬冷藥逐人忙

大渡河魚甚美皆巨口細鱗鰕也本草以鰕為
石桂魚

小躍冰泉玉不如細生仍得笔春蔬莫將北海金齏鱠
輕比西江石桂魚

喚魚亭

湖水涵空雪浸崖老龍以下聽差排從今分鉢供魚餅
日與隨鐘具一齋

謝韞玉送炭

佛頂分明火焰高黑鑿何事助焦熬只銷一酌梅花雪

我已官曹似水曹

黑鑿黑玉也

寄題用之太丞真意閣

真醫曾活水中龍三卷奇書玉笈中酒熟定應登傑閣

與龍對酌海螺紅用之居龍水故以孫真人活龍事實之紅螺觴名上所賜用之者今無恙

否

欽定四庫全書

方舟集卷六

宋 李石 撰

詩餘

如夢令

橋上水光浮雪橋下柳陰遮月夢裏去尋香露冷五更
時節蝴蝶蝴蝶飛過閒紅千葉

前調

憶別

憶被金樽勸倒燈下紅香圍遶別後有誰憐一任春殘

鶯老煩惱煩惱腸斷綠楊芳草

生查子

春情

小桃小杏紅和雨和煙瘦不是點胭脂素面偏宜酒
也是慣傷春可惜閒時候正要畫眉人與作雙娥鬪

前調

新花上苑枝枝上嬌鶯語日日抱花心啄破胭脂雨
鶯飛鶯去時誰與花為主守等却飛來再見花開處

前調

今年花發時燕子雙雙語誰與捲珠簾人在花間住
明年花發時燕語人何處且與寄書來人往江南去

前調

荷花人面紅月影波心見扇子倒拈來敲落紅香片
窻下剪燈花今日眉深淺留得鏡中看覺破春山遠

搗練子

送別

斟別酒問東君一年一度一回新省百花飄舞茵斟
別酒問行人莫將別淚裛羅巾蚤歸來依舊春

前調

佳人

腰束素鬢垂雅無情笑面醉猶遮扇兒
搨瞥見些雙
鳳小玉釵斜芙蓉衫子藕花紗戴一枝
簷蔔花

長相思

暮春

花飛飛絮飛飛三月江南煙雨時樓臺
春樹迷雙鶯
兒雙燕兒橋北橋南相對啼行人猶未
歸

前調

重午

紅藕絲白藕絲艾虎衫裁金縷衣釵頭
雙荔枝鬢符

兒背符兒鬼在心頭符怎知相思十二時

前調

佳人

花深紅花淺紅桃杏淺深花不同年年吹暖風
鶯語中燕語中喚起碧窻春睡濃日高花影重

烏夜啼

紅軟榴花臉暈綠愁楊柳眉疎日長院宇閒消遣
荔子賭擲蒲瑩雪涼衣乍浴裁冰素扇新書繡香薰被梅
煙潤枕簟碧紗幮

前調

鸞鏡愁添眉黛羅裙瘦減腰肢一回見了一回病彈指
悞佳期 醉裏情騰淚洗夢中著摸魂飛一春多少閒
風雨亭院落花時

前調

送春

繡閣和煙飛絮粉牆映日吹紅花花柳柳成陰處休恨
五更風 絮點鋪排綠水紅香收拾黃蜂留春盡道能
留得長在酒杯中

朝中措

聞鶯

飄飄仙袂縷黃金相對弄清音幾度教人誤聽當窻綠
暗紅深一聲夢破槐陰轉午別院深沉試問綠楊南
陌何如紫榭西林

前調

贈趙牧
仲歌姬

綠楊庭院覺深沉曾聽一鷺吟今夜却成容易雙蓮步
步搖金歌聲暫駐顰眉又去無計重尋應恨玉郎殢
酒教人守到更深

前調

贈別

凌波庭院藕香殘銀燭夜生寒兩點眉尖新恨別來誰
畫遙山南樓皓月一般瘦影兩處憑欄莫似桃花谿
畔亂隨流水人間

一剪梅

憶別

紅映欄干綠映階閒悶閒愁獨自徘徊天涯消息幾時
歸別後無書有夢來後院棠梨昨夜開雨急風忙次
第催羅衣消瘦怯春寒莫管紅英一任蒼苔

前調

百濯香殘恨未消萬緒千絲蓮藕芭蕉臨歧猶自說前
時輕剪烏雲解翠翹雨意重來風已飄南陌行人折
柳橋此間無計可留連枕上今宵馬上明朝

醉落魄

春雲

天低日暮清商一曲行人住著人意態如飛絮才泊春
衫却被風吹去朝期暮約渾無據同心結盡千千縷
今宵魂夢知何處翠竹芭蕉又下黃昏雨

臨江仙

佳人

煙柳踈踈人悄悄畫樓風外吹笙倚欄聞喚小紅聲薰
香臨欲睡玉漏已三更坐待不來來又去一方明月
中庭粉牆東畔小橋橫起來花影下扇子撲飛螢

前調

醉飲

八曲闌干垂手處燭光花影踈踈一尊共飲記當初綵
毫濃點雙帶要人書日暮不來朱戶隔碧雲高掛蟾
蜍琴心密約總成虛醉中言語醒後憶人無

前調

有宅一區家四壁年年花柳深村父兄隨處燕雞豚折
腰歸去何苦傍侯門擬射九鳥留白日假饒立到黃
昏卧龍老矣及三分不如把手堂上燕芳罇

前調

老母太恭人三月二十一日生是日仍遇
己卯本命作千歲會祝壽子孫三十八人

九九之年逢降慶生年生日同時金花紫誥鬢銀絲乞
身香火地日戲老萊衣渾舍集成千歲會子孫三世
庭闈共將春酒祝金卮蟠桃三月暮莫怪看花遲

滿庭芳

送別

江草抽心江雲弄碧江波依舊東流別筵初散行客上
蘭舟休唱陽關舊曲青青柳無限輕柔應爭記三年樂
事珠翠擁鰲頭離愁知幾許花梢著雨紅淚難收看
煙火吳天萬里悠悠一望珠宮絳闕蓬萊路應在皇州
仍回首蜀山萬點明月滿南樓

木蘭花

轆轤軛門前井不道隔窻人睡醒柔絃無力玉琴寒

殘麝徹心金鴨冷
一鶯啼破簾櫳
靜紅日漸高槐轉
影起來情緒寄遊絲
飛絆翠翹風不定

前調

一春閒却花時候
小閣幽窻長獨守
晴雲南浦夢還空
初月西樓眉也皺
馬嘶何日門前柳
脉脉盈盈相見後
心頭有事不難知
面上看誰真箇瘦

南鄉子

十月海棠

十月小春天
紅葉紅花半雨煙
點滴紅酥真耐冷
爭先

奪取梅魂鬪雪妍
坐待曉鴛遷織女機頭蜀錦川枝
上綠毛么鳳子飛仙乞與雙雙作被眠

前調 醉飲

裏帽撚吟鬚我是蓬萊舊酒徒除了茅君誰是伴麻姑
洞裏仙漿不用沽
弱水渺江湖醉裏笙歌醉裏扶縱
飲菊潭餐菊藥茱萸醫得人間瘦也無

西江月 漁父

一脉分谿淺綠數枝約岸歌紅小船橫繫碧蘆叢似我

江湖春夢 曬網漁歸別浦舉頭鴈度晴空短蓑獨宿
月明中醉笛一聲風弄

八聲甘州

懷歸

向吳天萬里一葉歸舟歲月儘悠悠有清歌一曲醉中
自笑酒醒還愁幾度春鷗轉午塞鴈橫秋漁笛蓑衣底
依舊勾收 多謝飛來雙鶴水邊林下伴我遨遊笑老
萊晨昏色笑為親留有向來素琴三尺枕一編周易在
牀頭君知否家山夢寐渾勝瀛洲

雨中花慢

次宇文吏部
贈黃如圭韻

潑灑雲霞空濛霧雨長堤柳色如茵問西湖何似粉面
初勻畫道軟紅香土東華風月俱新舊游如夢塵緣未
斷幾度逢春蓬萊閣上風流二老相携把酒論文最
好是四娘桃李約近東隣別後使君鬚鬢十分白了三
分是人笑道醉中文字更要紅裙

醉蓬萊

望長江東去逐客西來幾逢秋杪江草江花約鬢絲俱

老朝士紅萸佳人雪藕別後忍孤歡笑楚水樓臺巫山
宮殿五湖煙渺 又是征帆萬里行去舊恨鱸魚昔盟
鷗鳥九日江南上蓬萊仙島三度劉郎黃花醉裏問我
幾時來到寄語西風饒他老子莫欺烏帽

漁家傲

贈鼎湖
官妓

西去征鴻東去水幾重別恨千山裏夢繞綠窻書半紙
何處是桃花溪畔人千里 瘦玉倚香愁黛翠勸人須
要人先醉問道明朝行也未猶自記燈前背立偷彈淚

乾坤
廣濟

欽定四庫全書

集部

方舟集卷八

詳校官庶吉士_臣龍廷槐

主事_臣呂雲棟覆勘

謄錄監生_臣徐元秀

謄錄監生_臣馮克鞏

欽定四庫全書

方舟集卷七

宋 李石 撰

奏議

論荆鄂兩軍戰守勝勢疏

臣再蒙聖恩賜臣御筆知遇訓勉有加伏讀自勵敢不
靡捐少圖報稱臣先日與趙搏等論戰守之策搏欲守
湖陽其後王宣欲守順陽而王彥以公文欲取重兵於
襄陽臣竊疑諸將各自為計凡境上士民軍中兵將曲

折詢訪殆盡尋以道里遠近山川險夷繪為圖然後知
三將所言未為盡善臣出圖共論議二將辭屈王彥亦
以守湖陽順陽為非是當日再議用今日初八日以出
獵為名同往新野一帶踏勘勝勢意欲合兩軍之力則
戰守俱利也戎事至重社稷安危將士生死之繫若事虛
譚必蒙實禍無可疑者臣自知智力淺薄每臨一事不
敢不盡心憂深而思苦夙夜汲汲類如此仰奉詳審之
戒益不敢懈弛俟王彥等回一一議定具圖并劄子奏

知伏乞睿照

重名節疏

臣聞名節者士之所以自重亦以重國也上之人設為高爵厚祿縻致天下之士士各挾其所養所學趨而赴之所趨者未必得徃徃失其所自重何也取以金玉棄以管蒯擇以菁英廢以稊稗朝夷暮跖乍毀乍譽所取於世者重輕相絕矣先正司馬光曰臣不敢惜官職平生粗知名節夫士之所以自期者能以光之言為勸則上之人輕重予

奪當須如何處之苟愛憎毀譽之未決千載論議之未白而一世誣讒鮮有不為風波之民者士亦進退去就於此矣且漢染秦汚俗時君侮慢待士詆訶及於貴近執縛加於士夫至有甘羞辱以就富貴多矣如不職不勝任帷薄簾蓋不修不飾故為隱忍諱避之詞賈誼至慟哭太息為帝言之且曰上設廉恥禮義以遇其臣而臣不以節行報其上者非人類也今陛下容直言則循默者勉表廉潔則貪墨者勸旌忠義則怯懦者勇崇孝弟則兇悖者化顧

臣何說以贊願陛下令監司帥臣於逐路州縣歲舉廉吏各一二人朝廷籍記與陞陟差遣歲舉孝秀之士一人登名禮部以備召試為異時臺閣器使亦養名節風化之一助也豈唯門地科目之重而已哉可以飭士行矣臣久去闕庭不識忌諱惟陛下恕其萬死

草冗員疏

臣聞有事則有官官所以任事官之增減計事之多寡也昔人謂省官不如省事蓋事煩則官冗必然之理也

夏商之官倍於唐虞周之官又倍於二代者事煩而官增也以今之事況古之事凡幾則其官可知矣仰惟國家因事建官以事之不可廢則官之不可省乃今欲為陛下省冗官豈有其說乎將遂廢其事以就官之省乎今官之冗又有出於一事一官之外者官之冗而無其事以處之蓋以員多為冗也今之吏部姓名之籍皆其員也且以三歲科舉取士之所當得賞賚任子之所當出至於流外推恩錫賞亦其所當授者且以所當得之官

使之蒙其名而不得其事可乎官以員為冗又可知矣竊嘗謂用闕以處員量員而制祿闕有數而用亦有數是二者法不可紊也然則求所以為省之道復求所以處之者宜如何也且省數十小吏大吏一人之食小吏數十之食也有可併則併之有可罷則罷之但事不至廢而省於廩稍之給者此省大吏之術也任子之初補與文學之初攝誠能創祠廟百千以處之分省大吏之祿以養之俾得理為考任雖薄其祿無害蓋時異事異

入仕既衆而冗濫難革若是而冗員可革矣

營田疏

天下之利皆生於無所用旱之舟水之車此無用之利也夫有用者人知競而急趨之而無用者則不屑而棄之初不知無用乃有用之資沿邊不耕之田乃無用之利也今之江漢與巴漢乃昔之人所嘗屯兵其地取其不耕者耕之以為食為息兵持重之計寬取民餽餉之勞國家知之置營田之官於其地蓋得之矣恐言之未盡

行行之未盡至願陛下詔有司悉出意而為之今有司
所患者不過曰耒耜錢鏹之費耕耘芟築之人耳誠使
有司稍借其費又蒐汰兵之老弱不任穿帶者募蔣手之
閒民雜耕於其地寬以歲月之力視其歲入之厚薄而
為田官之殿最此誠裕民之一術也且治人之疾則必
為之藥而冀其愈陛下既知民之疾取有司寬剩之財
以裕之是知其疾而為之也疾未愈而藥不繼陛下將
何以憂之乎然則營田者亦裕民之一術也

武備疏

文武相為經緯之術二者要不可偏廢特所尚有緩急耳且人之身血氣為榮食氣為衛今特以榮氣之強健而廢其衛氣可乎國家弭兵無事既已有歲自以為尚文之世然求所謂輔成文治以裨益政體者則未之聞陛下以神武不殺為威寓六兵於詩書之教廟筭深遠非草野所當慮然以臣所慮特其粗者嘗謂虞舜干羽之舞人徒知其為文德不知其以蹈厲之節而寓其擊

刺之威以明不輕用武也今之教閱之法亦昔人干羽之意雖曰文德無廢其武可也昔魚朝恩老於兵間已不識郝將軍之陣為李臨淮遺法況不習其教者乎州之禁軍縣之弓手所以為教閱之法者寄其緩急之用耳欲用其人必資其教且小人非居安於無事則必使之為蹴踘屨張運其筋力馳驟其血脉習為冒險赴危之狀目熟旌旗耳習金鼓而不懼怯者此教之以緩急之用也且自二十餘年之間邊圉綏靜其可環甲挽強

者皆以老簡汰其少壯者已不知戰陣為何等事甚可慮也今之州縣教閱者乃素備耳今又於教閱之法不得專意為之而廢其事所謂禁軍弓手州縣冒法差役趨走指呼與衆人同所謂教之者兵官巡尉以時一出按例為之遇春秋大閱有司未免有損經費而徒為玩習之具此何異棘門之戲哉臣願行下州縣禁軍弓手不得違法差出兵官巡尉教閱之籍時稽考之以示安不忘危之意

劄子

學校劄子

已卯
上殿

臣聞學校者長育人材之地也如有美材必資之於良
匠欲求人材之美而不為擇師雖有材而無所用矣教
官者學校之師材之匠也祖宗之法率以科甲高者為
之又以試中學官者為之不輕付也頃歲以來凡有出
身官不問可否皆得為學官作為文字語言求丐廟堂
往往得之至有甚庸繆者僅曉句讀竊科目者亦得為

之服几襲裳竊師長之寄為士子所侮笑有不登講席
不說題目書考遷秩以去且師之不擇至此欲望人材之
美可得乎陛下比年以來取藩府學之大者為堂除其
餘則舉以付吏部依法差注是亦作新學校之意矣蜀
遠萬里大郡所得堂除者不過三四人其餘方州則科
甲當得者然後赴部今蜀士三歲一舉十名中所得者
無幾人且一郡必得一教官蜀之餘郡安能盡得科甲
高者與應格之人且安能人人裹糧萬里取一教官闕

於部中乎不若略為之權衡以比其輕重高下而進退
之今欲乞令侍從以上歲薦才可為教官者各舉一二
人籍記於吏部以俟堂除又三歲類試亦得試學官嚴
其所取之目合格者登其名於吏部以次授之則濫吹
之師不容遁迹矣

賑濟劄子

庚寅
上殿

臣聞賑濟者朝廷仁政之一也要當以實惠行之務為
虛文而實惠不至前日邛蜀擾擾是也且昔人荒政所

用者常平義倉也頃年所至州郡往往應急那兌平糶之法名存實亡矣今朝廷所謂賑濟云者諸司遵奉行下州縣發陳廩設糜粥循習故事而已此外稍費支吾則束手無策不免臨時科於上戶饑民因執符檄以求飽上戶有不能給則攘竊爭奪之禍生嘯聚殺掠理之必至蓋相夸虛文徒惑民聽反使饑民生心也況乎春夏青黃之不接秋冬新陳之或愆常歲有之萬一更乘以歉艱物價翔貴指常平義倉以為實惠足以寬上戶

之責慰饑民之心前日邛蜀之憂未見其可懲也仰惟
陛下臨御以來軫念全蜀所以豐衣食之源為水旱之
具亦至矣然常平義倉明知其僅存虛額而畫餅可足
以療饑乎且如增料錢引給降度牒入粟補官此近歲
州縣魚足裨補仁政之一也或更指定一項錢物再申
明常平義倉糴糶之法如昔人富人倉之類可得一年
糧歲備應用無窮而不求之臨時或可為善後計也臣
言有可采乞自睿旨行下戶部詳酌施行

邊報劄子

伏覩四川宣撫司西陲九月內連有捷音此皆國家威靈速暨將士久蓄之憤激於一朝取勝為快雖曰可喜而有可慮者敵久懷詐心隱伏二十年其發必不遽第時出以誤我此其計不難破也天下之患曰久曰近而天下之兵曰奇曰正久者期之以歲月之外近者謀之於旬朔之間歲月之兵以其正而旬朔之兵時出其奇可也今敵情尚遠歲月而我以旬朔之奇恐彼未盡奮

其隱伏之毒而我之力先屈矣近者敵寨纍纍近邊以
為果動則未有必勝於我之術以為未動則屯聚鳴嘯
異於常時此其心欲誘我以羸而困我以數我後戰則
為其所制我先戰則致曲於我必然之勢也比者劫寨
兩勝之又取秦州於一夕之戰皆我先戰而彼之大軍
未動兵法所謂出其不意故勝之勝則勝矣不過旬朔
之利歲月之外不可不深圖而熟慮之也譬夫以一壯
士而與百穉子鬪以壯士之力驅而喝逐之無難乃求

一搏而投之於頃刻之快則賁育之技至此亦竭矣今敵情悠悠巢穴幽深所驅者吾兩河之赤子與契丹渤海之遺類以嘗我而致隙而我悉力赴之無筭使果攻得其地能守乎此不可不過為之慮也且此特西陲耳其他並淮循江而上我之所以備禦者不可不盡至於敵為無窮而我亦為無窮敵為不測而我亦為不測量敵慮患制勝於廟堂之上而授成筭於將帥槩此一方可以類推也今者西陲三帥皆以大兵出有司帑藏隨

費隨給更一再舉則累歲所儲告竭當一取於民民且
憂笑敵以多方誤我惟深圖國家無彊之休勿以目睫
近效為可常姑以為馴致尅復之漸可矣天下幸甚

乞小路蠻都王承襲劄子

照會本州據小路蠻都王阿示狀乞依邛部川蠻王體
例承襲父官統轄蠻部未蒙給降告勅并換印事本州
契勘先於紹興三十年十二月據進義校尉小路都王
即即狀為年老願依邛部川都王例令長男阿示承襲

官爵統轄蠻部探報虛恨蠻賊作過事所有見用印記
係竹林錫窟鬼主朱記欲乞換作小路都王朱記為文
本州保明具申本路帥司乞行申奏至紹興三十一年
准本司劄子坐准尚書兵部牒準紹興三十一年九月
二十七日樞密院劄子指揮依所乞關吏部出給小路都
王阿示承襲父郎即進義校尉付身下本州給付所有
印記自合就用元印行使劄付本州照會自後未準降
到告勅下本州給付緣阿示係是懷義嚮化專一探報

蠻賊往來作過委是忠款可嘉及應副年額馬數不闕者今照得邛部川蠻都王嘉祐年內酋長牟墨達貢朝廷蒙賜官爵後來年墨死長子宜克承襲宜克死長子韋則承襲韋則死長子阿菜於政和六年三月承襲阿菜年老長子蒙備承襲父封其蒙備見係勅授金紫光祿大夫行懷化校尉山前山後百蠻都鬼主今來小路都王阿示乞行承襲委有上項體例除已具申尚書省乞早賜施行

乞減科買墨煙劄子

石比準撒下本州和買印造七十四界錢引墨三千二百八十五斤石自到官後已節次買發過一千八百斤外尋檢照舊案牘見得日前每界所買墨不過二千七百斤往往買發不足而今次所買過於每界五百餘斤緣本州墨工止有五戶又所燒松煙率近生界比年以來燒煙人戶多是藉口採斫禁山松木竊慮日久別致透漏見今黎州數十里外一望空山委是於邊防不便

欲望台慈特賜指揮檢照舊科所買墨數量行裁減却均敷下諸州出墨去處立為中制貴憑買發久遠遵守豈惟嚴護禁山邊面亦不致透漏矣

乞科降鹽本錢劄子

照會本州今月二十四日準本路轉運司公牒坐據蒲江井監申契勘黎州乾道四年分冬衣賜鹽一百三十擔半并乾道四年分歲計鹽四百九十六擔零在監至今未見前來打請乞下黎州差人將柴茆錢取撥施行

牒州差人前去關請施行契勘本州元準本路轉運司
遞年科降錢引四萬道應副支遣後來節次止以蒲州黑
鹽一千七百九十擔零對折上件錢引四萬道今本州
自備柴茆腳錢每年計一萬二千餘貫前去搬運歸州
科與民間納錢應副歲計支遣常是積壓數賣不行後
來更於紹興二十八年元立科約數外添差使臣二十
餘員一年請給動以萬計無可那融指準又兼運兵衣
賜絹帛邛州近年別無正色亦是折支黑鹽每匹不過

六十斤上下又令本州自備脚費搬運緣自去年饑歉之後賣鹽遲滯凡百用度並以黑鹽準折抵去年歲終積下鹽六百三十餘籠變轉不行并有未請去年秋冬季及冬衣賜鹽計一千二百四十餘籠合用柴筴腳錢三千八百九十餘貫亦無指準至今未曾打請即因大段闕乏其官吏軍兵請給鹽不免自行變賣遂致侵射賣鹽人戶月額往往破家逃竄誠可矜憫石竊詳前項蠲除閩山鈔鹽指揮其弊即與本州科配民間賣鹽事

體相類在於窮邊尤繫利害理宜優恤欲望台慈特賜
詳酌將今年合應副本州歲計鹽住行科支依舊年未
措置折鹽已前時暫那融本錢引四萬道降下本州充
今年一歲省計支遣所貴少蘓民間變賣急闕困苦之
用所有蒲江合支本州黑鹽仍乞自使司均敷應副成
都府或附近州縣支遣亦少減兩州支移腳錢之費

國子監看詳安鼎補韻畧錯誤劄子

按禮部韻畧同亦作全崇亦作宗疲亦作罷之類並係

兩字一義禮部韻更不重出止附注其下今者詳到蟹
字蝨蟹之蟹欲下注云亦作賊牒字庚業之牒欲下注
云亦作業按經音雖借賊為蟹借業為牒即是兩字兩
意若更注亦作字於其下如禮部韻例是合兩意為一
意兩字為一字也竊見蟹賊牒業禮部韻自有本注分
明只合依本注兩兩分押不合更添入亦作字與禮部
韻所注亦作字以相溷亂轉使舉人疑惑委是難以施
行

表

賀冬至表

乾用九於天下式顯帝符復來七於地中永隆化國光
生黼辰歡動紳綏恭惟尊號皇帝陛下剛健日新聰明
時憲觀文察變既望雲物而書齋心服形以待陰陽之
定隆五日一朝之養享千秋萬歲之期臣出守邊符再奉
召節仰瞻雙闕不違咫尺之威與從八能誓竭涓埃之效

會慶節賀表

中國其有聖人誕彌厥月大功而為天子於萬斯年舉
得歡心同歸慶治恭惟尊號皇帝陛下循堯之道繼文
之聲聖德本於好生神武行乎不殺克嗣無疆之厯坐
隆有永之期臣出守邊符入奉召節方寸玉陛雖阻奉
於瑤觴咫尺威顏行伏瞻於象魏

天申節賀表

聖人退藏於密益顯重明天子必有所尊親逢盛旦舉
歸慶治普洽歡心恭惟尊號皇帝陛下道妙難名功成

不處撫二百載中天之運成三十年必世之仁厯數有
歸知上皇之乃貴明聖迭作惟文王之無憂臣久去闕
廷遠乘邊障屬堯冥之初度騰嵩嶽之三呼飲福用錫
厥民同臻有極大德必得其壽仰祝無疆

黎州賀冬至表

聖人有作先天而天弗違化國初長御日而日不失權
忭之極率普所同恭惟皇帝陛下復見天心乾行物首
恡舒獨運辨六氣以儲神消長得宜協四時而觀妙雲

物備書於魯史厯年永卜於周正孚惠而信在中斂福而皇作極臣身縻遠服目遡昌辰老歲月以乘邊未辭蜀道仰雲霄而稱慶尚想漢儀

謝厯日表

出佩麟符中頒鳳厯大矣帝臨之赫粲然王度之新竊以天道有生育之權難於推測聖人敷簡易之德所以範圍庸示邦條無輕民事恭惟皇帝陛下祈年有水嗣服無疆至誠與覆載相參大信如寒暑不失臣敢不益

勤本務恪守遐封齒髮屢新任坤維之留滯毫釐勿爽
奉乾造以周旋

又

測土圭而正影再造慶基調玉燭以分光例頒遠服式
循舊貫祇奉新書恭惟皇帝陛下久則生神積而化聖
日遲速而有度天後先以弗違法象得堯舜之心律厯
糾漢唐之步天下用九而治既底雍熙王者奉三無私
靡容僭忒臣敢不周旋邊政勸課農功入奉晨昏視桑

陰而自惜出分宵旰無泰畧之或欺

眉州謝厯日表

王者奉三無私仰承堯運乾元用九而治爰及夏正遵
舊貫以敷休拜新書而登受恭惟皇帝陛下賁文曾飭
泰治方來淳者表王道之無疵熙者彰帝載之有永執
兩端而恭已斂五福以錫民底日以授百官仰飛龍之
在御次春而大一統頒治象以維新臣敢不仰對明時
誓堅晚節惜奉親之寸晷激事主之孤忠鳳厯改元固

以接千歲之統麟經紀事尚可補四時之書

又

次春而大一統益茂聖時底日以御百官遠頒侯服惟
皇錫福與世作程恭惟皇帝陛下天覆堯仁日躋湯德
御身以六氣之辨扇物以八風之和協星紀之方周考
歲端而布閏陰陽大妙水土克平鳳紀千齡已遞煩於
推策龍飛四海足可兆於豐年臣敢不視晷事親勉期
奏計夏時協序仰舊貫之足憑魏闕馳神及新年之可

賀

黎州到任謝表

半刺新除濫叨申命一麾改授洊出誤恩既見吏民具
宣德意朝廷所以望臣者不薄孤生所以至此者有由
祇荷寵靈尤深感涕竊念臣學惟泥古愚不適時偶秦
第於乙科免力耕於丁籍間蒙召對叨寸進於上庠遂
獲執經陪諸生於下坐教道無術糾率罔功為親補外
者已跨十年去國思君者寢歷三任引遡龍飛之日課

功馬政之秋許投老以乘邊豈自新之無路此蓋伏遇
皇帝陛下沉機獨運聖造無私因壘崇降秉文心而修
教舞千苗格躬舜孝以通神知臣之持義或能守邊察
臣之不貪或可互市致茲孱陋預有委掄臣敢不移孝
為忠悅近來遠勉遂安輿之養不辭叱馭之勞六詔瘴
煙誓竭殞身之報九霄日月尚餘奏計之期

淵聖皇帝慰表

諱承萬里本自流聞義激羣心至於殞越功成不宰法

在可傳重惟前人艱難播越之勤用肇今日恢復休明
之運日車未返仙馭莫追皇帝陛下性穆堯仁心因周
德孝弟旁達雖足貫神明之幽熙洽所鍾更當思社稷
之大益寧宸極務節聖情臣限以守藩無緣趨赴

狀

進易疏論語說狀

性入者無形理入者無象性理二者聖人獨得之學述
所自得修其語曰詞令以為斯文之懿也堯曰文思以

思為用舜曰文明以明為用曰思曰明自內融洽而非外鑠謂不如是不足以發舒純粹敷為三綱五常經緯之具也陰陽象數深之而不精刑名法度述之而不盡蓋徒迹一偏之文而昧於窮理盡性者聖人之道日遠矣顏子之於文欲罷不能其曰雖欲從之末由也已何說也子貢之於文可得而聞其曰不可得而聞者何說也且以六經觀之皆聖之文性理所寓日月大明有目者咸觀雷霆大聲有耳者咸聽不知其所謂不可得而

聞與末由也已二子果何所晦昧於其所師承也得非以聖人性理為獨得之學歟循其所自得以求所傳之心則六經之文皆其寓也六經之文易為之深諸子所以紹述於六經者論語又為之蘊學者欲有求於無形無象以究聖人之道未見有捨六經門戶而造堂室者也曷亦次第量力以馴致其深淺所入於二書者雖未至於聖人忘象忘言之學然求之於帝王之心傳闕里之家法於性理悟入二書者其幾是乎推修身緒餘而

措之於天下國家其誰曰不然仰惟陛下以舜之文繼
堯之文父子一學授受於六經日新矣魏乎其詞與天
無極淵乎其旨與海同深頒於教條諸侯之慮無所遁
播之事物百姓之用莫能窺至其隱於常勝之道庸示
不殺之武者積久生神皆此中流出雖使顏子子貢復
生委質聖代於金華絕業尚不敢擬議況如臣輩碌碌
庸受者哉靜念向者備員上庠以學專席尋即外補以
學為職躬自履踐因事施設未嘗一日不學而所與共

之者所至羣生徒而教之相與誦磨以游泳聖涯者實
不敢欺於心以取愧於天下以流為非聖之習如是而
已項因生徒綴緝臣所說易與論語幾成編次易則取
六十四卦彖大象而槩之曰外䟽論語則以已見折以
諸家所長而為之說不敢自謂於二書有得去朝十年
再蒙收召無以仰裨聖治美芹之薦采薪之義或有取
焉謹併臣近所撰五箴別紙繕寫隨狀上進以聞

策問

問退之為蜀之日子厚為越之雪夫師至於二子可無憾也然尚以怪取吠是知師道固難矣師固以道教人也學者受其說行之終身非若今之傳授句讀僅能與乳祿爭長雖日更一師初不損益也言師人則亡矣其道果盡無傳乎諸弟子以有若似夫子而曾子有所不從如曾子之意必得孔子復生而後師之則師道廢矣然子夏曾子各以其說教授其所以授學者果出聖人之意乎秦人焚書而賴以不絕者師道在也漢興六經

各習其師名為專門如匡衡有師道可觀如張禹有師法可試夫六經亦多說矣而所謂可觀可試者果何在乎諸君之學豈但句讀其必所傳有素試為言退之子厚所以取怪於人與夫曾子所不願於有若而漢儒各知有師傳者願共學焉毋畧

問賈生董生漢所謂有用之學明於治亂安危者也劉向以賈生比伊管以董生比伊呂夫伊呂王者之佐管仲霸者之佐向舉以許與二子賈生表餌之說人以為

疏董生天人之說人以為緩夫二子之學不見試與夫
試而未盡固已不幸而疏緩之譏不免於世俗成敗之
口今試優劣二子所學與夫所遇之主可以比擬於伊
尹呂望管仲者以無輕劉向之言不然漢無士矣

問仰惟國家兵興以來無利不誨然皆有術不至浚我
以生者鹽鐵榷酤有取於常賦之外民皆樂然輸之亦
知其所不得已自以其力所當勉者也昔漢之所資者
巴漢之粟唐之所資者江淮之財尚能各以一方之儲

足用天下則欲合二代所資以為今日足用之計苟有
可以寬紓吾民而不乏於公上者願聞其術

問仰惟國家版圖之舊自河以南半淪敵境邇者天心
悔禍以開神聖恢復之運王師所指民相與壺漿先道
喜見漢官之臨江淮以北關隴以西復為王土輿地所
志可考而知然知所以復之而未知所以守之則悠久
之慮廟筭亦少勞矣竊計所復境土往來敵衝鋒鏑踐
躪荆棘荒蕪亦難乎其為彼民矣戶口不足則無兵耕

稼不復則無食事力交病計將安出焉欲分兵以守之乎則沿邊之屯勢各有不可分也欲移粟以實之乎則餉道之遠力有所不能支也然則建牧守命將帥重其權委之措置而責效於遲久諸君試迹昔人南北相控制所嘗講者亦一說也

問賈誼陸贄之學搢紳先生喜稱誦之謂儒者之文有益於世用不徒為紙上空言莫二子若也竊謂誼在漢猶有縱橫策士之風贄在唐猶有科舉進士之累不然

何所言之多而施於世用如是之落落難合也世之讀
二子書者未嘗不追咎時君用之不盡而歎二子所遭
之屈抑自有說乎今國家崇尚史學誠欲得如二子者
而盡其用使之無空言不遇之歎如昔人者諸公當自
得之

問天下事成者不可壞而弊者不可不革前後之相因
唱和之相應鮮有不出於斯二者易曰幹父之蠱者事
之不免於弊而裕父之蠱者則亦無壞其成因其成而

新其弊足矣此所謂克家之子舉善去惡堯則知之而以累舜於耄勤總師之後者舜今日即位而明舉八元去四凶而天下安之如出一人不改其無為之治者天下事弊則新之而成者終不可壞此昔人論損益而不及二帝者有說也仰惟新天子即大位今甫周歲矣仰遵太上皇之政如堯舜父子授受一家未之有改也至於舉善去惡天下顒顒傾耳拭目以仰望於新政者孰有先於此者乎寬大之令優恤之科以形於詔旨者

郡國奉行相望郵傳皆可考也願與諸生訂之

--	--	--	--	--	--	--	--